

痘疹傳心錄卷之六

懷德堂

西吳朱惠明 著

報點口訣

凡痘之初發也發熱可決重輕肖形可占順逆是以
痘瘡見點便視形色稀密榮枯攸分善惡色澤神安
點如珠粟神枯色黯瘡出乾焦點報粗肥稀疏可必
標舒瑣屑也細密繁密非常帶熱敷瘡陸續出齊雖甚
密猶爲可治一齊湧出掀紅平塌縱稀疏未必生長
細細白頭如癩瘡乾枯必作內攻形啾啾紅點似丹
朱焦萎定成憔悴勢粗肥饅頂點子不紅終白陷頭

六脚歛桃紅光潤定爲祥蚊迹蚤斑刻日而登鬼錄
堆沙攢簇引日而返泉鄉肌白嫩則皮薄嬌紅體黃
瘦則痘多褐色人黑皮粗痘色必然慘黯宜辨肌色
不同未可一例而識只要尖縱有神不喜嬌紅平塌
未熱先敷數點或一點俗名報痘又名厲痘無何複熱舒瘡
吉凶未審先發塊而後發瘡塊名風毒而急治先發
瘡而後發塊塊名鬼腫以難醫痘始報于太陽頤頰
唇肋者多凶瘡初生于兩耳舌喉胸背者不吉故曰
順不憎多逆嫌一點黑疔先見諸瘡誰敢彰形賊痘
諸痘未起脹而間有
色如黃金者若生諸痘不堪貫汁辨認若真急

宜挑剔是以裏症未平

吐利便秘煩躁

痘雖出而毒

猶在內透肌發散解毒爲先便調神靜

二便清調

身

雖熱而毒已出外補兼升發安表相兼設使內外症

平斯又不須過治矣

一凡雜痘初出形色似乎正痘當辨及之

一爲風熱發爲瘡疹初見形色亦似乎正痘

痘始

且夫痘之爲毒也稟于有生之初藏于腑臟

天一所生之臟

也腑之內隱顯莫測聲臭不聞隨感而見猶鏡之取火

鏡中之火雖在使無日之晶光相射何能發也先哲

曰痘藏伏處藥銃相似火未至也寂然無聲火既及也赫然震烈矧痘毒之猛烈非可言喻及其呈見利害妍媸有難悉舉殆非刻舟求劍者所可語也

一凡痘初見點于正面吉部相去二三寸一顆尖細淡淡桃紅色者必稀而輕也若初見點于正面凶部二三相並或五六成叢或赤或白頂平而少神者必密而重也

一經曰病有輕重藥有淺深故痘之初出有輕而有重也稀者輕而密者重夾癰疹而出者半輕半重如發熱一日報點者太重二日報點者重微微發熱三

日報點爲輕四日身涼報點爲尤輕自報點三四日
方齊磊落如珠大小不一等尖圓緊實顆粒分明淡
紅漸加明亮根窠紅活頭面稀少心胸無人事安寧
飲食如常二便清調順也痘初報點雖易粗肥形似
饅頭或一熱雖齊出而勻朗紅澤雖稠密而陸續出
來能食便調此險之可治也一熱齊湧出顆粒不分
粘聚成叢頂若火刺乾紅灰白色不光澤頭面頸項
胸背舌喉稠密無縫嘔吐噦瀉腹痛腰疼喘急腹脹
煩燥悶亂失血者此逆之不可治也

一或問發熱痘便一齊出者或發熱數日而陸續出

者何曰一熱齊出者乃表虛也肺主皮毛脾主肌肉脾肺氣虛則腠理不密肌肉不實不能約束於外則毒火沖擊而出太驟也譬君失其正則寇盜蜂起若熱久而陸續出者乃正氣充足肌膚厚肉分堅則毒受制歸附故陸續而漸出也譬君正則四夷皆化而爲善也故曰表虛者易出而難靨表實者難出而易靨也

一凡痘初見點以火照之簇簇于皮中不見不起者若非風寒壅遏必氣虛不振風寒宜散之氣虛宜補益而兼升發爲主也

一凡痘疹出不快者症必有因當詳審而調之。一素壯實之人皮膚厚肉腠密毒氣難以發越宜勻氣爲主經曰氣勻則出快。一素虛弱之人先曾瀉利而元氣不足不能拘血運毒而出者宜溫補而兼升發爲主經曰正氣足而痘自生化也。一天時嚴寒運氣又在寒水司天毒氣爲寒氣鬱遏而不能快出者宜辛熱之劑發之經曰毒得熱則行得寒則凝正此謂也。一炎暑亢極運氣又在君相司天煩渴昏瞶此爲兩火相擊而陰水乾涸經曰少水不能滅盛火而陽獨治獨治者不能生長也宜清暑益氣爲主

○一客受風寒發散之劑表之得汗而痘自出也。
一內傷飲食胃氣不行氣血凝泣而毒不能快出者
宜濁陰之劑利之。一稟賦腎水不足毒火彌熾水
不能制反爲所勝毒邪留連於裏而不快出此爲獨
陽不生也宜滋水以制陽光

一或問經曰痘出身涼微熱爲上吉熱微而痘出反
密熱甚而痘出反疎者何也曰熱微而痘出密者必
其兒口燥渴唇焦裂表雖不大熱而裏熱甚也熱甚
而痘出疎者必其兒口不渴唇舌滋潤能食便調身
雖大熱而裏氣和平也豈可以熱之輕重論哉

一或問痘必假天行時氣鼓擊而出有出而亦有不
出者何也曰夫痘毒中于有主之始畜無形臭及有
外邪觸之則忽焉盡發若不感動其邪縱時行發痘
而不出也

一報點紫色或黑滯而腰背痛不止者不治方見前
腰痛門

一凡報點青色如筋頭大不起凸此冷疔凶也紅斑
如錦紋者徧身如蛇皮者如疹如瘡者逆候也

一痘報點而口中腥臭者乃毒乘肺胃煎熬潰爛內
之症故臭也宜清金解毒湯或甘桔湯加連翹蟬蛻

苟藥治之隨應藥者醫之功也若失聲喘急噦噎者
凶也

附治驗

一兒痘初出便身作痒爬搔不寧余謂風寒外乘滯
於皮膚而作痒也搔之者運動以散之也以升麻葛
根湯服之又用荆芥穗焙熱以紙包之運其痒處應
手而愈

一兒痘出隱隱不見喘咳寒熱交作以升發藥不應
召余視曰時天大寒毒爲寒氣所抑腠理封閉氣血
凝泣而然也當用辛熱之藥佐之治以桂枝葛根湯

得微汗而前症悉平痘豁然透出調理愈

一兒痘已見形噦吐不止面色枯槁口唇焦黑余謂胃氣脫絕毒伏於內不能盡出三日而死

一兒痘不易出吐瀉不已醫咸謂毒氣上行則吐下行則瀉擬升發之劑使痘盡透吐瀉自止治之愈甚召余視之熱微安靜痘勻朗嬌紅曰此脾胃氣虛治宜溫補而兼升發或曰痘未盡出而溫補豈不黨邪爲禍乎曰醫無定法合宜而用以透肌散又六君子湯加蟬蛻升麻桂枝陳倉米生薑大棗治之愈。又一兒痘症如前咸以升發而不固真元致伏陷不治

一兒痘隱隱不出面白神疲熱微飧泄余謂脾胃氣虛不能送毒以小異功散加升麻川芎蟬蛻木通陳倉米服之瀉止痘出又補中益氣湯調理愈

一兒痘出勻朗形綻凸而色淡紅兩腿痛甚叫號不已召余視曰身半已上俱屬陽分身半已下俱屬陰分腿亦屬陰腎所主也陽虛陰弱則毒乘虛凝滯於腿而作痛耳以活命飲治之二劑痛稍止繼以十全大補湯加附子間服八味地黃丸調理而愈。又一兒痘症類前不以早治痛傷元氣色漸微白而唇白面青四肢厥冷痘變紫黑而六日逝。一張氏子五

歲痘出隱隱腿痛不息余謂稟賦腎家精氣不足逆也痘不能盡出喘脹狂亂痘變紫黑五日而亡。凡病之始神氣尙存可以藥制之若其始謀不豫宜然罔知生氣已去化工難續雖聖人豈能改天命也哉故曰履端於始序則不愆此之謂也

一兒七歲痘初報點于上唇右及右太陽身肢稠密正額平塌少神顴頰不現四肢厥冷人事昏瞶喘急腹飽便秘余謂風寒壅遏毒火彌熾于內氣血不能運行于經絡故肢冷痘不易透者此寒包熱之症治宜疏散表邪爲主用升麻葛根湯加川芎蟬蛻山查

山甲等服之又加味獨聖散桑蛭虫攻之六朝正面俱起七朝空處補出贈痘諸症悉平調理而愈

一兒初發熱頸項間紅腫如桃痘雖標形而癭作膿痘伏陷而卒。又一兒痘三日耳前紅腫如桃余謂癭毒也以葛根湯加荊防牛旁甘桔治之外以圍藥塗之腫退痘起而愈亦有不應藥者毒起痘陷而死一兒痘初見點驚搐不止余謂心血不足邪因而客之以歸地赤芍川芎茯神遠志酸棗仁蟬蛻少加石菖蒲治之搐止愈

一兒痘初報點驚搐不止衆曰驚痘多吉或言邪從

搐散無害余謂曰驚出于心搐發于脾若發之不止乃脾虛血少也未可以爲吉不信醫治之二八而卒每驗發驚不止者後難收拾也。又一兒痘初見點驚搐不止昏瞶不甦而逝

一兒痘出二三日而發驚搐余謂毒不透撤乘于心心受邪而不安治以導赤散加蟬蛻黃連紅花天麻鈎藤石菖蒲治之愈

一兒痘出隱隱發狂不已便秘溺澀余謂毒火鬱結于陽明以大柴胡湯利下而愈

一凡報點二三日其間碎密如麻子者此夾疹也

見方

前夾疹門

有皮肉鮮紅成塊者此夾癰也

方見前夾癰門

二症有

吉有凶當究正痘形色而斷

一兒痘已半出喘急腹脹煩躁便秘譫語不寧余謂毒火彌盛以承氣湯得利行數次諸症悉平而愈

一丙子孟春五日談氏女痘已三日閱歷諸名家皆曰磊落綻凸勿藥有喜舉家大慰居無何乾焦紫黑氣絕而死仍懇諸家往視之則默然無以應舉家哭罷而余至閱視審詳曰此兒身肢雖冷心胸尚溫六脉雖無而衝脉不絕猶有生氣蓋變色而死非痘之故也究其初熱時爲年糕歲食所傷不能運化以致